

國朝耆獻類征初編

國朝耆獻類征初編

國朝耆獻類徵初編卷百二十一目錄

詞臣七

金德嘉

史夔

魏學誠

周金然

陸肩堂

陳遷鶴

俞長城

張明先

黃中理
車鼎晉

沈廷文

賈國維
鄧鍾岳

傅王露

孫致彌

梁佩蘭

竇克勤

顏光敏

陳大章

唐孫華

楊中訥

冉覲祖

阿金

周起渭

顧圖河

陳璋

李甦麟

補錄

車鼎晉

竇克勤

劉大章

許維翰

許中允

劉鳳麟

賈中允

賈中允

劉其文

劉其文

劉其文

劉其文

劉其文

劉其文

劉其文

劉其文

劉其文

劉其文

劉其文

劉其文

結五

國朝耆獻類徵初編卷百二十一

通奉大夫前署江西巡撫江西布政使司布政使湘陰李桓輯

詞臣七

金德嘉

翰林檢討金先生諱德嘉字會公號豫齋湖廣黃州廣濟人祖楚濱公諱鼎赤以經學爲人師父復濱公諱之純萬厯乙卯舉人歷任興安知州明季游賊煽禍危城保障勞績最著擢知漢中府未莅任而歿先生五歲而孤與伯兄德崇事母李宜人至孝從師嚮學卓犖有志於古年十五爲諸生復罹李宜人喪時當鼎革之交楚中荒亂頻仍家輒遷徙先生與伯兄棲止茅屋風雨不蔽爨爨

幾絕而晝夜雒誦琅琅作金石聲學業日進歲試冠軍食餽學宮
中順治庚子鄉試公車歸里下帷授徒介然以名節自持屏絕邑
中竿牘有墨令某招致再三先生堅拒弗往久之就廷試得教授
安陸在任九年倡明正學造就人才講舍彬彬綽有安定遺風康
熙壬戌會試舉第一人制義淳龐典雅不在先秦兩漢以下楚中
風氣開自劉穉川熊鍾陵兩先生得先生乃鼎足焉旣入翰林館
中推爲碩儒莫能望其肩項凡遇編纂職務殫思萃力若明史列
傳表揚殉節諸臣一統志分撰楚省諸郡以及禮記解義通鑑講
章鱗次就橐最夥丁卯典貴州鄉試得士二十人多名俊黔中文
風自此始闢先生品行端慤當名場馳驟標新領異之會泊焉自

守深以浮競是恥其所著作俱落落自抒胸臆儼若鼎彝法物視
夫輦輓組織之工蔑如也以故齟齬不得志一旦致仕以歸同朝
無不歎惜之座主澤州陳公贈行有句云紅燭三條知己淚秋風
五色故侯瓜頻年萬事悲歌外至竟騷人楚調賒激昂悱惻情見
乎詞矣然先生林居以來坦懷任運絕無寥落曠放之氣荒江寂
寞蓬蒿滿徑斗室中圖書充塞兀坐編摩寢食不倦以復濱公手
輯自警編與宋名臣言行錄相倣得自兵燹散軼之餘珍爲笥祕
晚年更續纂元明諸賢以廣之其他撰述歌吟卷帙不下數十至
於家徒壁立口不言貧足跡不入城府幾二十年如一日蓋其明
義利之介審行藏之宜舉夫窮經考史蘊積有素者一一矢諸躬

行實踐未嘗稍斂於主敬存誠之學故能始終堅定有大醇無小疵屹爲儒林完人得年七十有八而終其門下士私謚曰貞孝先生云余旣與先生誼託同方令子啟洛又爲余在成均所拔士比及並賦閒居音書間至商量舊學獨有蒹葭秋水之思先生題我先君志矩齋讀書圖特揭六經大義以與矩字證明其於異學之荒渺俗學之支離披繩切而指歸嚴尤足深致服膺也啟洛屬余爲先生傳故不敢以不文辭爰述其梗槩如此

論曰孔門立教曰博文約禮文禮合而後爲載道之學故程子曰游夏亦何嘗秉筆爲詞章也自長楊子虛諸體出沿及於風雲月露而文之載道者少所以宋儒特標道學以別於儒林之目夫卒

無有軼於道之名而可以言學者卽漢儒經明行修若董江都鄭
康成輩未必與宋儒歧塗異轍也金先生者介於漢宋諸儒閒固
可無愧設得置諸虎觀石渠邇英崇政之地俾克大展其抱負則
爲世法程豈小補哉然使先生非終以潛確自居則亦無以見其
難進易退之節後之論世者於是可考而知焉

右傳彭定求撰

德嘉晚年鍵戶著書時同郡顧景星張仁熙劉醇驥往往追摹秦
漢宗尙王李嘗歸有光爲秀善婉媚德嘉獨不爲高論力摹韓歐
雖閎肆博瞻遜於國初前輩而先民矩矱彷彿猶存

右四庫提要張維屏錄

先生作朱陸異同考謂集羣聖之大成者孔子集羣賢之大成者
朱子又謂姚江之徒龍谿緒山假尊師煽羽翼土苴傳注糟粕前
賢末流乃有何心隱李卓吾潏蕩潰決此豈姚江逆料所及哉又
謂天下非無才之患有才而不遜志於學則大患所論皆守正而
持平而先生生平之宗旨亦於此可見矣

右松心日錄張維屏撰

史夔

史夔字胄司江南溧陽人康熙壬戌進士官至詹事府詹事胄司之詩當時不必有赫赫名然迄今讀之意足韻流無一閒句閒字得唐賢之三昧者也臺閣而不涉應酬山林而不入寒瘦足覘詩品

右 國朝詩別裁集小傳沈德潛撰

宮詹扈從 北巡著扈 蹕集典試兩浙著章臺集分理河工著觀濤集祭告南海著扶胥集

右潤故張維屏錄

蔡翁精子平之學史胄司訪之蔡告以生一孫推其命若遲一時

則大貴史叩其日時大驚曰予今歲得子正其月日時也蔡曰此
兒必入閣卽今文靖公也康熙辛酉胄司攜眷入都泊舟水驛生
子聞鐵工家亦生子問其時正相同心識之後文靖已官清禁胄
司南歸復經其地訪之則門宇如故一少年持斤斧操作甚勤問
之則辛酉某日生者也公思之竟日旣乃悟曰此四柱中惟火太
盛惜少水制幸生舟中得水氣補其缺若生於鎔冶之地則以火
濟火全無調劑矣

右茶餘客話阮葵生撰

魏學誠

康熙乙卯先君子銓知山西清源縣同考布政司試得肄禮士四
高平澱洋牛先生介休李先生清源王先生其一蔚州諭德魏一
齋先生刑部尙書敏果公冢子也敏果公時任戶部侍郎清望蓋
天下洎先生來謁縣署丰格玉燭雅談紛屬先君子喜甚命大文
曰侑餐而亟駕語同官曰僕雅不謬知人已未澱洋先生中禮部
試式先君子謝博學鴻儒試秋引疾歸壬戌先生年二十有六繼
中式成進士癸亥先君子卽世先生爲位暨文而哭之慟是冬試
內閣辦事中書舍人甲子侍敏果公歸里日宿寒松堂佐輯儒宗
錄知言錄庸言凡數十卷不復有赴銓意洎癸未 天子西巡先

生例迎道左

詔改翰林院檢討旋晉詹事府右春坊右諭德兼

翰林院修撰是時李先生正代州學澂洋先生銓知廣西灌陽縣
王先生繼知山東臨淄無何澂洋先生卒於灌陽李先生卒於代
王先生亦以耄疾罷獨先生里居十有四年至是而年猶未書家
世清嚴班行屬目旋總裁歷朝詩館勤其業乙酉主貴州布政司
試復命詔提督江南學政丙戌禮部試復特命同考偕給
省胥稱得士復詔充端敬講官當是時先生四年侍從三命
司衡而寒松之思雅未嘗一日少釋也泊莅江南振淹滯蒐才駿
昕夕無停晷又三年而鬢髮胥白大文倦游歸間用諸生禮謁把
卮道歲月暨牛李王三先生遊從之雅候已三十四年矣輒爲慨

然者久之己丑先生以劉太宜人憂歸壬辰冬大文入都時先生
需次於李氏園復獲祇謁乙未春歸亟詣園別先生曰僕業決歸
休計恐不復把晤是秋寄示魏家泉記憶泉詩暨十對詞蓋年五
十有九歲矣戊戌大文復入都再謁先生而先生歸歸而久不復
至都庚子先生次子繹中布政司試式辛未來試禮部而大文遽
聞先生病病而繹遽歸而先生病業以革且不復晤矣嗟乎五十
年師友相知之誼一旦愴訣而先生子董煊暨繹專使蘄誌先生
墓大文奚忍辭謹按狀先生諱學誠字無僞號一齋世居蔚州之
邢家莊後徙於城曾祖祖胥 誥贈資德大夫刑部尙書考象樞
敏果公也順治丙戌進士事具 國史妣李氏 封夫人生母劉

氏 封太宜人先生生而警穎七歲工詩博覽強識誨弟學讓學
謙學謚學訥胥有師法學讓學謚胥中布政司試式學謚知貴池
縣學訥餼於州學娶賈氏甲午舉人知渭南縣時泰女卒 贈宜
人繼 封宜人賈氏卽前宜人妹也副室門氏盧氏子五人董煊
學謙子而序居長繹中鄉試式者也素大同府學生潔府附學生
綬女一適府附學生李若霖孫六人松封松壽松筠松年松林松
貞先生生順治乙酉九月二十六日卒今辛丑二月十一日年六
十五歲以五月十二日葬於州南之逢駕嶺敏果公 賜塋之左
前宜人合祔焉先生勇於義好拯人之急嘗請蔚州廣昌改本色
爲折色獲允力拒弁丁園田土事獲釋倡隄環郭壺流河而水不

爲暴里人胥德焉其事敏果公也當公長西臺百僚震悚先生實
飲之公晉大司寇日研讞詞誦案牘以竣公之裁折故先生雖用
文儒進而雅諳吏才公巡撫直隸先生策衛以從時啟委巷閒情
僞嘗直知柏鄉縣邵公嗣堯於獄其事尤偉公出或袖金玉器玩
突排戶置案上值累千金先生亟擲戶外曰而何人敢玷吾家案
語尤聞士大夫間嘗語董煊素曰敏果公奏疏雖祇溫室之戒然
橐本胥出吾手當時有科不鈔部不知而關機務尤鉅者他日當
爲而曹語然則先生之所以摧大議剖大疑以飲公汲宋之列而
益章 聖天子臣鄰弼直之義於千萬禩者其識蓋遠矣大文旣
廁先君子知先生之顛末而復述先生之所以飲敏果公者並系